

Waray - Pag-ampo Salmo - Praying WP Psalms 2019

**Salmo 68:1 Bumuhat na an Dyos, hinaot pa unta, ngan pasadngon adton
mga kaaway n'ya; hinaot nga an nagdudumot ha iya, kumalagiw tikang
ha atubangan n'ya.**

**Salmo 5:9,10 Diri gud kasasarigan an pulong han akon mga kaaway; an ira
la karuyag amo an pagpatay. Manamit ngan matam-is an ira mga pulong,
kundi puno gud ini hin makamaratay nga limbong. 10 Paghukmi ngan
siroti hira, O Dyos; magdara unta han ira pagkapukan an ira kalugaringon
nga magraot nga mga tinguha. Paiwasa hira ha imo atubangan tungod
han damo nira nga mga sala, ngan han ira pagsupil ha imo.**

**Salmo 7:1,2 Ginoo, akon Dyos, ako nadangop hin panalipod; Talwasa ako
ngan bawia han mga nagbubukod, 2 bangin sugad hin liyon ako nira dad-
on ha dapit nga waray makakatalwas ha akon, ngan didto ira ako
paghunothunoton.**

**Salmo 11:6 Iya gindadad-an an mga maghuka hin baga ug asupre nga
naglalaga.**

**Salmo 18:2 An Ginoo an naalinsakob ha akon, makusog nga arayohan ngan
madig-on. An Dyos an akon sinasalirongan, kon upod ha iya waray
kahadlokan. Sukad hin taming iya ako sinasalipdan, ngan dida ha iya
waray kabarak-an.**

**Salmo 18:14 Iya pinamana, kaaway ginsarang, tungod han kikidlat hira
nanadlagan.**

**Salmo 18:17 Hiya an nagtalwas, nagbawi ha akon, ha mga gamhanan nga
kaaway gahom; ug ha ngatanan nga akon kasina, para ha akon mga
kusgan gud hira.**

**Salmo 18:39 Nahatag ka hin kusog ha pag-awayan, kon han kaaway ko, an
pagdarag-an.**

**Salmo 18:45 Han ira kaisog hira nawawad-an, nakurog tikang ha ira
salipdanan.**

**Salmo 18:48 Gintalwas ako ha akon kaaway man. Imo ako ginpadaog, O
Ginoo, Kontra gud hadton mga kaaway ko; ngan ginpanalipdan pa gud
ako nimo, tikang hadton magpintas nga mga tawo.**

**Salmo 23:3 Hin bag-o nga kusog hi ako tinagan, ha matadong nga dalan ako
gin-unhan; pagtuman niya han iya ginsaaran.**

**Salmo 27:11 Itutdo an imo karuyag ha akon, Ginoo, an kinahanglan ko
buhaton. Ha matadong nga dalan ikaw pagtugway, kay damo inin akon
mga kaaway.**

Salmo 31:15 Dayuday ginmamangnoan mo ako; talwasa ako han akon mga kaaway, hadton mga nagtitimaraot ha akon.

Salmo 34:4 Nag-ampo ak' ngan ginbaton han Ginoo, gintalwas niya han tanan kahadlok ko.

Salmo 34:7 Anghel han Ginoo bantay, panalipod, an ha Ginoo nahadlok ngan natahod.

Salmo 34:13 Ayaw gud pagyinakan hin maraot na, ayaw na pagsinumat hin mga buwa.

Salmo 34:17-19 An Ginoo namamati han magtadong, kakurian nira iya kukuhaon. 18 Hiraniay gad la an aton Ginoo hadton mga nahuhulop na hin duro. Tinatalwas niya adton nagugupong, an nawad-an na han tanan nga paglaom. 19 Damo an gin-aantos nga kakurian hadton mga mag-upay gud nga katawhan; kundi an Ginoo may'da katalwasan, tinatalwas hira hini gud ngatanan.

Salmo 35:1-8 Kontraha adton mga nakontra ha akon, O Ginoo, ngan awaya adton mga nakikiaway ha akon! 2 Dad-a an imo taming ug hinganiban ngan kadi pagbulig ha akon. 3 Alsaха an imo bangkaw ngan iaraway nga atsa kontra han mga nagbubukod ha akon. Sumati ako nga ikaw an akon Magtaralwas! 4 Mapirde ngan maalohan unta an mga nagtitinguha pag-iparatay ha akon! Magbalik ngan magupong unta an mga naglalarang hin paglingo kontra ha akon! 5 Mapariho unta hira han upa nga iginpapalid han hangin, Samtang binubukod hira han anghel han Ginoo! 6 Magmasirom ngan magmadalunot unta an ira aragian samtang hinahampak hira han anghel han Ginoo! 7 Nagbutang hira hin bitik para ha akon hin waray ano man nga hinungdan ngan nagbuho hin hilarom nga luong pagdakop ha akon. 8 Kundi hiaabtan hira hin kabungkagan ha diri pa nira hibabaroan ito; mag-uunay hira kadakop han ira kalugaringon nga bitik ngan kahulog ha luong nga ira ginbuho!

Salmo 35:10 Masiring ako ha Ginoo hin kinasingkasing, "Waray gud usa nga pariho ha imo! Pinananalipdan mo an maluya tikang han makusog, an pobre ngan kabos tikang han nagtatalumpigos!"

Salmo 36:7-9 Hin pagkamahal, O Dyos, han imo dayuday nga paghigugma! Hin-aagian namon in panalipod ha ilarom han lambong han imo mga pako. 8 Nagpapatakas kami han pagkaon nga imo gin-aandam; ginpapainom mo kami tikang han salog han imo pagkamaupay. 9 Ikaw an surok han ngatanan nga kinabuhi, ngan tungod han imo kapawa kinikita namon an kapawa.

Salmo 37:5 Ihatag han Ginoo an imo kalugaringon; sarig ha iya ngan bubuligan ka;

Salmo 37:23,24 Nagmamando an Ginoo han dalan nga pag-aagian hin usa

ka tawo ngan nananalipod hadton mga nakakalipay ha iya. 24 Kon matumba hira, diri madadayon an ira pagkatumba, kay babangonon hira han Ginoo.

Salmo 37:40 Binubuligan niya hira ngan tinatalwas hira; tinatalwas niya hira tikang han mga magraot; kay nadangop man hira ha iya basi panalipdan.

Salmo 39:1 Nagsiring ako, “Maghihirot ako han akon binubuhat nga diri ako makasala pinaagi han akon dila; diri ako magyayakan hin bisan ano samtang hirani an magraot nga mga tawo.”

Salmo 41:4 Siring ko, “Ginoo, ako nakasala, malooy ka ha ak' ngan ako tambala.”

Salmo 42:5,11 Kay ano nga masulob-on man ako? Kay ano nga nasasamok ako? Maglalaom ako han Dyos, ngan ha makausa pa pagdadayawon ko hiya, akon magtaralwas ngan akon Dyos. 11 Kay ano nga masulob-on man ako? Kay ano nga nasasamok man ako? Maglalaom ako han Dyos, ngan ha makausa pa pagdadayawon ko hiya akon magtaralwas ngan akon Dyos. (Salmo 43:5)

Salmo 43:1 O Dyos, ipahayag nga diri ako salaan, ngan panalipdi an akon hingyap kontra han mga diri dyosnon; talwasa ako han buwaon ngan magraot nga mga tawo!

Salmo 44:4 Ikaw an akon hadi ngan akon Dyos; ginpapadaog mo an imo mga tawo,

Salmo 51:4 Nakasala ako ha imo—ha imo gudla, ngan ginbuhat ko an maraot ha imo atubangan. Sanglit matadong an imo paghukom ha akon; ngan waray sayop an imo paghatag hin sirot.

Salmo 52:5 Sanglit pupukanon ka ha kadayonan han Dyos; kakaptan ka niya ngan aagawon ka tikang han imo balay; kukuhaon ka niya tikang han kalibutan han mga buhi.

Salmo 54:7 Gintalwas mo ako tikang han ngatanan ko nga kakurian, ngan hinkit-an ko nga napirde an akon mga kaaway.

Salmo 55:18 Pababalikon niya ako ngan talwas tikang han mga araway ngan akon inaasdang kontra hin damo hin duro ngan mga kaaway.

Salmo 59:2 Talwasa ako hadton magraot nga mga tawo; bawia ako hadton mga parapamatay!

Salmo 60:12 Kon dapig ha amon an Dyos magdadaog kami; pipirdehon niya an amon mga kaaway.

Salmo 63:11 Tungod han Dyos an hadi malilipay man, tungod nga gintagan hiya'n pagdarag-an. Tanan ngan nagsusumpa ha iya ngaran, kundi baba ngan buwaon pagtatakpan.

Salmo 66:3 Siring ngadto ha Dyos, “Pagkaurosahon! hadton mga butang ngan

im' buruhaton! imo gahom hin pagkadako hin duro, mga kaaway mo ha im' nanyuyukbo.

Salmo 68:6 An minimingaw tinatagan puroy-an, ngan an mga priso ira katalwasan. Kundi adton mga masupilon gudman, adto pagpupuyo dit' ha kamingawan.

Salmo 68:35 Hin pagkaurosahon hinin Dyos gudman, nga aada han dapit n'ya nga baraan! Kusog, gahom, katawhan n'ya tinatagan. An Dyos han Israel dayawon han 'tan'an!

Salmo 70:1 Talwasa ako, O Dyos! Ginoo, buligi na ako yana!

Salmo 71:4 Bawia ako, O Dyos ko, tikang han magraot nga mga tawo, tikang han gahom han magbangis ngan yawan-on nga mga tawo.

Salmo 71:13 Mapirde ngan malaglag unta adton mga nagtitimaraot ha akon! Mahiubos ngan maalohan unta adton mga nagtitinguha paghibang ha akon!

Salmo 72:12 Mga kablas nga nagtatawag ha iya, iya manta nga binubuligan hira; sugad man an mga tawo nga kabos na, ngan adton mga ginpasibayan nala.

Salmo 76:12 Gin-usmod mga prinsipi nga garboso, ginlilisang an kahadian nga dagko.

Salmo 79:9 Buligi kami, O Dyos nga amon magtaralwas, tungod han imo kalugaringon nga kadungganan; bawia kami ngan pasayloa an amon mga sala, basi pagdayawon ka han mga tawo.

Salmo 86:17 Ipakita, Ginoo, an imo pagkamaupay, basi makaawod an ha akon nagtatamay; kon kumita hira han hatag mo nga pahalibway.

Salmo 91:14,15 Nasiring man an Dyos, "Akon tatalwason hira nga nahigugma ha akon; an ngatanan nga magtug-an nga ako Ginoo, akon pananalipdan. 15 Kon magtawag hira akon pamamatian, uupdan ko hira kon may-ada kakurian; tatabangan hira ngan pagpapasidungan.

Salmo 92:11 Kapirode han kaaway ko ak' hinkit-an, pagnguyngoy han magraot ak' hinbatian.

Salmo 103:10 Diri kita niya ginsisirotan, sumala ha igo ha aton ug kaangayan. Diri man kita niya ginbabalosan, sumala han aton mga kasalan

Salmo 104:9 Iginpahimutang mo an katutoban, nga diri gud nira nga paglalahosan. Basi diri nira na gud paglunopan an bug-os nga tuna hinin kalibutan.

Salmo 107:6 Niyan ha butnga han ira kakurian, an Ginoo ira ginsangpit, gintawag; ngan iya tinagan hira'n katalwasan, tikang hadton ira mga kasakitan.

Salmo 118:10,12 Damo'n kaaway in naglibot ha akon, kundi nabungkag ko

han kanan Dyos gahom! 12 Daw hin mga buyog ako giblibotan, kundi nasunog dayon daw kakugonan; tungod han kanan Ginoo kagamhanan, akon hira nagkabubungkag ngatanan.

Salmo 121:7,8 **Tikang han ngatanan mga kataragman, tatalwason ka han Dyos, pananalipdan. 8 Ha imo pag-abot ngan imo paggikan, bantay mo h'ya yana ngan ha kadayonan.**

Salmo 138:3 **Han akon pagtawag imo ginbaton man, im' ak' ginpusog han imo kakusgan.**

Salmo 140:1,4,5 **Talwasa ako intawon, O Ginoo, tikang hadton magraot nga mga tawo; ha mga magbangis nga tawo ako ipahirayo. 4 O Ginoo, imo ako panalipdan, tikang han kanan magraot nga kagamhanan. Talwasa ako han magbangis nga katawhan, nga naglalarang han akon pagkapukan. 5 Nagbitik ha akon an mga parayawan, hin pukot ako ira ginbitaran. Ngan ginbutang nira hirani han dalan, in damo nga bitik basi ako hidakpan.**

Salmo 142:6 **An akon pakibulig imo gad pamatian, kay tugob na ako hin mga kabidoan. Ha mga kaaway imo ako talwason, kay makurukusog hira ha akon.**

Salmo 143:9 **Nadangop ako ha imo hin panalipod, Ginoo, ha akon mga kaaway talwasa ako.**

Salmo 147:14 **Gintatalwas n'ya an im' mga pag-ultan, tikang han tanan nga mga kataragman. Ngan iya ka gud ginpatagusahan hadton giupayi nga katrigohan.**

Salmo 149:6-9 **Hin dagko nga tingog papaggigliata, samtang ira gindadayaw an Dyos nira. Upod in magtarom nira nga espada, nga pagkakaptan han mga kamot nira. 7 Basi pagpirdehon adton kanasoran, ngan pagkastigohon an mga katawhan. 8 Basi kadenahan ira kahadian, ngan hin puthaw an ira mga punoan. 9 Basi pagkastigohon an kanasoran, sumala hadton kanan Dyos iginmandar. Pagdarag-an ini han iya katawhan. Pagdayawa an Ginoo, dayawa man!**